

Siunnersuummut nassuiaatit

Siunnersuummut nassuiaatit nalinginnaasut**1. Aallaqqaasiut**

Pisortat Pisiortortarneranni Neqerooruteqartitsinermi Maalaaruteqartarfik pillugu Inatsisartut inatsisaattut siunnersuut UPA2015/118-imi Inatsisartut aalajangiiffigisaat tunngavigalugu suliarineqarpoq, tassani pisortat pisiortortarnerannut toqqammavissanik qularnaarisussamik Inatsisartut inatsisissaattut siunnersuummik Naalackersuisut saqqummiussaqaqquneqarlutik. Siunnersuut siusinnerusukkut Naalackersuisut 2018-imi upernaami ataatsimiinnermi oqaluuserisassangortippaat, tamatumali kingornatigut qinersisussangortoqarpoq. Qinersineq tunngavigalugu Inatsisartut aalajangiiffigisaat itigartinneqarpoq. Taamaattorli saqqummiuteqqinneqarpoq Inatsisartut aalajangiiffigisaanni nassuiarneqartutut sianigisat suli tunngavigitinneqarmata. Pisiortornerit pitsanngorsarlugillu ataqatigiissinnerisigut pisortat aningaasanik sipaaruteqarsinnaanerata aammalu pisiortortoqarnermi inuiaqatigiinni aningaasaqarnikkut kingunerisinnaasat nalilersortariaqarnerat Inatsisartut aalajangiiffigisaata nassuiarpai, taamaalilluni sianigisassat assigiinngitsut naleqquttumik oqimaaqatigiissinneqarsinnaallutik.

Tamakku tunngavigalugit Inuussutissarsiornermut Nukissiuuteqarnermullu Naalackersuisoqarfiup Aningaasaqarnermut Sulisoqarnermullu Aqutsisoqarfik (ASA) suleqatigalugu kommunit peqatigalugit suliariumannittussarsiuussisarnermut inatsisissatut siunnersuummik suliaqarpoq. Inatsisip pitsaasumik sunniuteqarsinnaanissaa qulakkeerniarlugu siunnersuummik unioqqutitsineq naammagittaalliuutigineqarsinnaassaaq pineqaatissiissutaasinnaassallunilu, taamaammata maalaaruteqartarfimmik pilersitsisoqartussaavoq. Arlaannaannulluunniit attuumassuteqanngitsumik nioqqutissanut sullissinernullu tunngasuni maalaaruteqartarfimmik pilersitsinikkut taamatuttaaq pisussaaffiit naammassineqassapput.

Tamanna tunngavigalugu neqerooruteqartitsisarnermut inatsisip unioqqutinneranik suliaqartartussatut nioqqutissanik sullissinernillu neqerooruteqartarnermut maalaaruteqartarfik nutaaq pilersinneqarpoq. Aalajangiisartoqarfik taaneqarpoq Pisortat Pisiortortarneranni Neqerooruteqartitsinermi Maalaaruteqartarfik, neqerooruteqartitsinermilu maleruagassat isumaginerannik qulakkeerisuuvoq.

Maalaaruteqartarfik pillugu inatsisissatut siunnersuut taama ittoq matumuuna saqqummiunneqarpoq siunnersuutigineqarlunilu neqerooruteqartitsisarnermut inatsimmut peqatigitillugu akuerineqassasoq.

2. Siunnersuummi immikkoortut pingaarnerit

Pisortat neqerooruteqartitsinerannut atatillugu naammagittaalliuuteqarsinnaaneq pillugu aalajangersakkat sanaartornermut tunngassuteqartuni neqerooruteqartitsisarneq pillugu Inatsisartut inatsisaanni aalajangersakkanit maannamut killeqartinneqarput, takukkit tamanna pillugu illuliorlunilu sanaartornermik immikkoortumi neqeroorutininik pissarsiniartarneq pillugu Inatsisartut inatsisaanni aalajangersakkat. Nioqqutissanik sullissinernillu neqerooruteqarnermut atatillugu naammagittaalliuuteqartarneq siusinnerusukkut inatsisitigit malittarisassiuunneqarsimanngilaq najukkanili aalajangersakkat assigiinngitsut naapertorlugit atuutsinneqartarsimalluni. Assersuutigalugu Kommuneqarfik Sermersuup neqerooruteqartitsinerata naammagittaalliuutigineqarneranik isumaginninnissamut arlaannaannulluunniit attuumassuteqanngitsumik maalaaruteqartarfimmik pilersitsiniarluni kommune qangali suliaqarpoq.

Siunnersuutip suliarineqarnerani pingaartumik neqerooruteqartitsineq pillugu inatsit aamma danskit naammagittaalliuuteqartarnermut inatsisaat isumassarsiorfigineqarsimapput.

2.1. Atuuffia

Siunnersuummi pineqarput Kalaallit Nunaanni neqerooruteqartitsineq pillugu naammagittaalliuutit neqerooruteqartitsisarnermut inatsimmi pineqartunut ilaasut. Taamaalillutik nioqqutissanik kiffartuussinernillu pisortat pisiortornerinut atatillugu neqerooruteqartitsisarnermut maalaarutit tunniunneqarsinnaassapput, aatsaalli killissaliussat pineqartut qaangersimappatigit, aammalu ilaatinneqassannginnermut aalajangersakkani pineqartuni ilaangippata.

2.2. Aaqqissuussaaneq

Siunnersuummi aalajangersarneqarpoq maalaaruteqartarfiup pingaarnertut aaqqissugaanera. Maalaaruteqartarfiup inuttarai siulittaasooq ilaasortallu sulianik ilisimasallit aalajangersimasumik amerlassusillit. Siulittaasooq Kalaallit Nunaanni Eqqartuussisuunermit toqqarneqassaaq, ilaasortalli sulianik ilisimasallit Naalakkersuisunit toqqarneqassallutik – oqartussanit kattuffinniillu assigiinngitsunit inassuteqartoqarneratigit tamarmik toqqarneqassapput.

Maalaaruteqartarfik allattoqarfeqarpoq ulluinnarni sulianik ikiuuttussamik.

Maalaaruteqartarfimmi siulittaasup maalaaruteqartarfiup suliaasaanik erseqqissumik malittarisassaliutissavai.

Eqqarsaatigineqarsimavoq siunnersuut immikkuualuttunut iluarsiiissutaanerusunik imaqassanersoq, eqaatsumilli suleriaaseqarnissaq pisariaqartinneqartoq qulakkeerniarlugu aamma siunertarineqanngitsumik killilersuinissaq pinngitsoortinniarlugu nalileneqarsimavoq siunertamut naapertuunnerpaassasoq pingaarnertut tunngavissat inatsisitigut aalajangersaaffigineqarnissaat, taamalu maalaaruteqartarfiup nammineerluni immikkuualuttunik immersuisussanngortinneqarnissaa.

2.3. Periusissatut maleruagassat

Naammagittaalliuutit maalaaruteqartarfimmut tunniunneqartarnerinut suliarinnittarnermullu aalajangersakkanik siunnersuut aalajangersaavoq.

Naammagittaalliuuteqarsinnaatitaasut tassaapput suliami inatsisitigut soqutigisaqartut tamarmik, matumunnga pingaartumik ilanngullugit neqerooruteqartut neqerooruteqarsinnaasullu, kiisalu oqartussat kattuffiillu Naalakkersuisunut naammagittaalliuuteqarsinnaasut. Kingullertut taaneqartut eqqarsaatigalugit matumani pingaartumik eqqarsaatigineqarput suliatigut kattuffiit il. il., neqerooruteqartoq sinnerlugu suliamik suliarinnissinnaasutut eqqarsaatigineqarsinnaasut.

Neqerooruteqartitsineq pillugu inatsit naapertorlugu naammagittaalliuut allaganngorlugu tunniunneqassaaq 10.000 kr.-nik naammagittaalliummut akitsuummik akiliisoqarluni.

Naammagittaalliummut akitsuummuteqarsaatit ilaat tassaavoq tunniussinissaq sioqqullugu iluamik nalilersorneqarsimannngitsunik naammagittaalliuutinik tunniussinissamut tamanna tunuarsimaartitsissasoq, taamaattumik annertussusaa tulluassalluni taamaalilluni naammagittaalliuutinut tunngavilersorneqarsimasunut aporfittut sunniuteqassanani. 10.000 kr.-t tassunga atatillugu neqerooruteqartitsinermut inatsit naapertorlugu naammagittaalliuutinut tulluurtumik qaffassisuseqartutut nalileneqarput.

Suliaq allaganngorlugu piareersarneqassaaq tamannalu tunngavigalugu aallaaviatigut aalajangiiffigineqartassalluni. Taamaattorli oqaasiinnakkut isumaqatigiinniarnertit pisariaqartillugu siulittaasumit aalajangiiffigineqarsinnaallutik. Illuatungeriit suliamut paasissutissiinissamut tatiginartumik peqataassapput aamma paasissutissat attuumassuteqartut tamaasa nassiutissallugit.

Aalajangiineq nalinginnaasumik amerlanerussuteqarnikkut maalaaruteqartarfimmit aalajangiiffigineqartassapput.

Tamatuma saniatigut maalaaruteqartarfiup peqataasumut suliami aningaasartuutit akileqqusinnaavai aamma neqerooruteqartoq ajorsartoq aalajangiinerit inatsisinut naapertuutinnngitsut inatsisinut naapertuutilersinnissai piumasaralugit, matumunnga ilanngullugu tunniussinermi aalajangiinerit, aamma neqerooruteqartup inatsisinik

unioqqutitsilluni iliuuserisaasa malitsigisaanik naammagittaalliuuteqartup annaasarisinnaasai taarserlugit.

Maalaaruteqartarfiup peqqussutaanik naammassinngitsumut aamma akileeqqusisoqarsinnaavoq.

Allaffissornikkut aalajangiinnermut akerliliinissamut periarfissaqanngilaq, aalajangiinerulli illuatungeriinnut nalunaarutigineraniit kingusinnerpaamik sapaatit akunneri 8-t qaangiutsinnagit aalajangiineq eqqartuussivinnut suliasanngortinneqarsinnaavoq.

3. Pisortanut aningaasatigut allaffissornikkullu kingunerisassat

Pisortat Pisiortortarneranni Neqerooruteqartitsinermi Maalaaruteqartarfimmut aningaasartuutit nalilersinnaaniarlugit neqerooruteqarnermut inatsisip nassatarisaanik maalaaruteqartarfioersaq aallaavigineqarpoq. Neqerooruteqarnermut inatsisip nassatarisaanik maalaaruteqartarfioersumut aningaasartuutit imatut ipput:

Siulittaasup akissarsiai:	50.000 kr.
Suliamut ataatsimut paasisimasalimmut ataatsimut akissarsiat:	3.500-5.000 kr.
Allattoqarfeqarneq, ukiumut ullut suliffiit	Ullut 15-20
Oqalutseqarneq, ukiumut ullut suliffiit	Ullut 5-10

Siuliani aningaasartuutit naatsorsornerinut tunngavigineqarput maalaaruteqartarfiup pilersinneqarneraniilli suliat piviusumik suliasanngortinneqarsimasut. Piffissami katillugit suliat 10-t suliasanngortinneqarsimapput, tassa agguaqatigiissillugu ukiumut 1,3-upput, taakkunanga 3-t itigartinneqarsimallutik, 1-i utertinneqarsimalluni 6-illu piviusorsortumik suliarisassatut tiguneqarsimallutik, suliarlu 1-i suli ingerlanneqarluni.

Maannakkut neqerooruteqarnermut inatsit malillugu maalaaruteqartarfimmut naleqqiullugu maalaaruteqartarfiup nutaap akisussaaffia annertunerussaaq aamma suliasat amerlanerusut suliarineqartussatut akuerisariaqassallugit.

Neqerooruteqarnermut inatsit malillugu maalaaruteqartarfimmut naleqqiullugu taamaattumik siulittaasup akissarsiaanut, paasisimasallit ilaasortat akissarsiaannut allattoqarfimmilu sulinermut aningaasat amerlanerusut immikkoortinneqartussaassapput.

Immikkut aningaasat annertussusaat siumoortumik aalajangeruminaapput, tassa naammagittaalliuutini suliasat amerlassusaat annertuumik apeqqutaassammata. Suliat naammagittaalliuutigineqartut amerlassusaannut aamma apeqqutaassaaq neqerooruteqartitsinermut inatsisip ataani pissarsiat qanoq amerlatiginersut.

Immikkut aningaasartuutit ilaannakuusumik naammagittaalliuuteqarnermi akitsuutit amerlanerulernerisigut isertitaqarnerulernermik naligiissinneqassapput. Mianersortumilli missiliuinermi aningaasartuutit imatut naatsorsorneqarput:

Siulittaasup akissarsiai:	150.000 kr.
Suliamut ataatsimut paasisimasalimmut ataatsimut akissarsiat:	3.500-5.000 kr.
Allattoqarfeqarneq, ukiumut ullut suliffiit	Ullut 45-60
Oqalutseqartitsineq, ukiumut ullut suliffiit	Ullut 15-30

Skema qulaaniittoq tunngavigalugu, ukiumut ukiumut naammagittaalliutit tiguneqartut amerlassusaannut naleqqiullugit, isertitat maalaaruteqarnermut akitsuutinngorlugit naammagittaalliortunit tiguneqartut ukiumut 150.000 kr.-t missaaniissasut naatsorsuutigineqarpoq. Aningaasartuutit tunngavik assigiittoq atorlugu ukiumut 350.000 kr.-ussasut naatsorsuutigineqarpoq. Amigaatigineqalersussat 200.000 kr.-t allattoqarfiup nammineq aningaasaliiffigineqarneranit matussuserneqassapput.

Allattoqarfiup maannakkut suliassa qarfiusut ilanngullugit Atuisartoqarnermut Unammilleqatigiinnermullu Aqutsisoqarfimmi inissinnissaanik aningaasatigut allaffissornikkullu kingunissat aallaaveqarsimapput. Ullumikkut aalajangiisartunut arlalinnut aqutsisoqarfiup allattoqarfimmik atuuffik isumagaa.

Nammineq aningaasalersuineq, allaffissorneq	200.000 kr.
Isertitat, allaffissorneq	150.000 kr.
Aningaasaliissutit tamarmiusut	350.000 kr.

Siuliani tunngavigisani aningaasartuutit nikingassuteqassappata tamanna missingersuutitut tunngasutigut kinguneqassanngilaq, suliarisaq nammineq toqqammavigisat iluanni aningaasaliiffigineqarmat.

4. Inuussutissarsiortunut aningaasatigut allaffissornikkullu kingunerisassat

Siunnersuut inuussutissarsiortunut aningaasatigut allaffissornikkullu kinguneqassanngilaq.

5. Avatangiisinut, pinngortitamut innuttaasullu peqqissusiannut kingunerisassat

Siunnersuut avatangiisinut, pinngortitamut innuttaasullu peqqissusiannut kinguneqassanngilaq.

6. Innuttaasunut kingunerisassat

Siunnersuut innuttaasunut kinguneqartitsissanngilaq.

7. Kingunerisassat pingaaruteqartut allat

Siunnersuut allanik annertuunik kinguneqartitsinngilaq.

8. Oqartussanik kattuffinnillu il.il. tusarniaaneq

Siuserisussut Naalakkersuisut UPA 2018-imi oqaluuserisassanngorlugu saqqummiunneqartumik Neqerooruteqartitsinermi Maalaaruteqartarfik pillugu Inatsisartut inatsisissaattut siunnersuut suliaaraat. Inatsisartunut qinersisoqalerneq pissutigalugu siunnersuut UPA 2018-imi oqaluuserineqanngilaq. Siunnersuummut siulianut naleqqiullugu siunnersuut manna imatut annertutigisumik allanngortinneqanngilaq nutaamik tusarniaatitsinissaq Naalakkersuisut pisariaqartissimanagu.

Siunnersuut tusarniaassutigineqarpoq piffissami 18. december 2017 – 22. januar 2018 ataanni tullerriaarlugit allattorsimasuni: Kalaallit Nunaanni Sulisitsisut, NUSUKA, CSR Greenland, Transparency International Greenland, Nunatsinni Advokatit, KANUKOKA, Kommuneqarfik Sermersooq, Qeqqata Kommunian, Kommune Kujalleq, Qaasuitsup Kommunian, Nunatsinni Nakorsaaneqarfik aamma Namminersorlutik Oqartussani naalakkersuisoqarfiit tamarmik. Tamatumani saniatigut piffissami tassanerpiaq siunnersuut tusarniaasarneq pillugu nittartakkakkut tamanut saqqummiunneqarsimavoq.

Matuma ataanni tusarniaanermi akissutit sammeneqassapput. Malugeqquneqassaaq tusarniaanermi akissutit uingasumik allanneqartassammata aamma akissutaasut pingaarutaasa tulluassusiat najoqqutaralugu taasassartai pingaarnerit allanneqartassammata.

Tusarniaanermi akissutit makkunanga tiguneqarsimapput: Naalakkersuisut Siulittaasuata Naalakkersuisoqarfia; Isumaginninnermut, Ilaqutariinnut, Naligiissitaanermut Inatsisinillu Atuutsitsinnermut Naalakkersuisoqarfik, Aatsitassanut Ikummatissanullu Naalakkersuisoqarfik, Aningaasaqarnermut Akileraartarnermullu Naalakkersuisoqarfik, Kommuninut, Nunaqarfinnut, Isorliunerusunut, Attaveqaqatigiinnermut Ineqarnermullu Naalakkersuisoqarfik, Kommuneqarfik Sermersooq; KANUKOKA, Kalaallit Nunaanni Sulisitsisut aamma Nunatsinni Advokatit aamma Transparency International Greenland.

Isumaginninnermut, Ilaqutariinnut, Naligiissitaanermut Inatsisinillu Atuutsitsinnermut Naalakkersuisoqarfik; Aatsitassanut Ikummatissanullu Naalakkersuisoqarfik aamma Transparency International Greenland siunnersuummut oqaaseqaatissaqanngillat.

Aningaasaqarnermut Akileraartarnermullu Naalakkersuisoqarfimmit tusarniaanermut akissut:

AAN-ip innersuussutigaa ataatsimiititaliap paasisimasalinnik ilaasortassaanik toqqaaneq pisortani aamma namminersortutut suliaqartut attuumassuteqartut suliaqarfimmi paasisimanninnermik pigisallit innersuussuteqareernerisigut pisariaqartoq.

Tusarniaanermut akissut tunngavigalugu aalajangersagaq allanngortinneqarpoq imaalersillugu ilaasortat paasisimasallit Naalakkersuisunit toqqarneqartassat Kalaallit Nunaanni pisortani suliaqartut aamma inuussutissarsiorfimmi suliaqartartut akornanni attuumassuteqartut

innersuussuteqareernerisigut. Siunnersuut tusarniaassutaammat maalaaruteqartarfimmi neqerooruteqartarnermut inatsit malillugu maalaarutininik isumaginninnerit aamma ilaapput. Tamanna Inatsisartut inatsisaannit peerneqarpoq, neqerooruteqartitsinermullu inatsimmi maleruagassat malillugit neqerooruteqartitsinernik saqqummiunneqartunik Pisortat Pisiortortarneranni Neqerooruteqartitsinermi Maalaaruteqartarfik taamaallaat suliaqartassaaq.

Maalaaruteqartarfimmi ilaasortat illuliorlunilu sanaartornermut aamma pisortat pisiortortarnerannut ilisimasaqartunik ilaasortaqaarnissaa § 2, imm. 4-mi erseqqissumik takuneqarsinnaanngitsoq Grønlandske Advokater nalunaarput. Illuliorlunilu sanaartornermut pisarialimmik ilisimasaqartut inuit amigaatiginissaannik maalaaruteqartarfik aarleqquteqarsinnaavoq.

Tusarniaanermut akissut tunngavigalugu Kalaallit Nunaanni pisortani suliaqartunit inuussutissarsiornermit attuumassuteqartunit innersuussinerit kingornatigut ilaasortat Naalakkersuisunit toqqarneqartussanngorlugit aalajangersagaq allanngortinneqarpoq. Taamaalilluni maalaarutininik suliaqarnissamut pisarialittut suliarisani ilisimasaqartunik maalaaruteqartarfiup ilaasortaasa ilisimasaqaarnissaat qularnaarneqassaaq. Taamatuttaaq neqerooruteqartarnermut inatsit malillugu maalaarutit isumaginissaat pillugu peerneqartumut tunngatillugu qulaani oqaaseqaat innersuussutaavoq.

Suliap maalaaruteqartarfimmut tunniunneqarnerata kingornatigut maalaaruteqartarfiup aalajangiussinera sapinngisamik saqqummiussimanissaa pillugu neqeroortitsisarnermut inatsimmi § 27, imm. 2-p assinganik inatsisisattut siunnersuut aalajangersakkamik imaqaanngitsoq Grønlandske Advokater ilanngullugu nalunaarput.

Pisortat Pisiortortarneranni Neqerooruteqartitsinermi Maalaaruteqartarfiat annertuumik kiffaannngissuseqartinnissaa pingaartutut isigineqarpoq, ilanngullugu aamma suliassanik isumaginninnissaminik aalajangiisartut aqqissuussineranut tunngatillugu. Taamaattumik suliassanngortitat maalaaruteqartarfiup aalajangiinissaanut piffissaliussamik ilanngussaqarnissaq tulluartuusutut isigineqarsimanngilaq.

§ 2-mi namminersortutut inuutissarsiorfik, suliamut piviusumut naleqqiullugu suliaqarfiusumit attuumassuteqartumit sinniisoqartinnissaanut maalaaruteqartarfiup ilaasortassaata amerlassusaasa affaannit innersuussisinnaatitaanermik tunineqassanera qularnaarneqassasoq Kalaallit Nunaanni Sulisitsisut nalunaarput.

Tusarniaanermut akissut taanna tunngavigalugu pisortani suliaqartunit aamma inuutissarsiorfimmit attuumassuteqartunit innersuussineq malillugu innersuussisarneq pisassasoq § 2-mi ilanngunneqarpoq.

Kommuninut, Nunaqarfinnut, Isorliunerusunut, Attaveqaqatigiinnermullu Naalakkersuisoqarfiup oqaatigaa maanna maalaaruteqartarfimmut atuuttumut

allattoqarfittut atormata takusinnaagaat akissarsisitseqqussut inatsimmi tunngavigisassamik aalajangersagaqanngittoq, soorlu neqerooruteqartarneq pillugu inatsimmi taamaattoqartoq.

Tusarniaanermut akissut tunngavigalugu maalaaruteqartarfiup ilaasortaanut akissarsisitseqqussut aalajangersagaq tunngavigisassaq ikkunneqarpoq § 2, imm. 7-imi.

Kommuninut, Nunaqarfinnut, Isorliunerusunut, Attaveqaqatigiinnermullu Naalackersuisoqarfiup aamma oqaatigaa maalaaruteqartarfiup sulinerata annertunerulersinneratigut aningaasartuutit amerlissutaasut, naammagittaalliuuteqarnermut akiliutit amerlanerulernerannik naleqqatigiissuserneqarsinnaassanganneqartut, ilumut piviusumik taamannak naleqqatigiissuserneqarsinnaanersut. Maalaaruteqartarfiup maanna atuuttup misilittagai tassaagamik naammagittaalliornermut akiliut amerlanertigut utertinneqartartoq. Tamatuma saniatigut naammagittaalliornermut akiliut millisinneqarsimavoq Neqerooruteqartarneq pillugu inatsimmut tunngasuni sanaartornermi suliassannortitat pillugit.

Tusarniaanermut akissut tunngavigalugu § 5, imm. 8-mi immikkoortoq nutaaq ilanngunneqarpoq, maanna naammagittaalliuuteqartoq tamakkiisumik imaluunniit ilaannakortumik tapersernejarpas § 5, imm. 4 naapertorlugu akiliutaasimasoq utertinneqassanersoq pillugu Naalackersuisut sukumiinerusumik malittarisassiornissamut tunngavissaqartinneqalerlutik.

Kommuninut, Nunaqarfinnut, Isorliunerusunut, Attaveqaqatigiinnermullu Naalackersuisoqarfiup aamma oqaatigaa suliffeqarfiit aamma pisortat oqartussaasut ilinniartunik sungiusartunillu atorfinitsitsinermi inuiaqatigiinnut akisussaaffeqarnerat pillugu Inatsisartut inatsisissaattut siunnersuummi kapitali 7-imi aamma 8-mi aalajangersakkanik unioqutitsinermi naammagittaalliuuteqarnissamut killiliinissaq amigaatigalugu.

Tusarniaanermut akissuteqaat tunngavigalugu § 1, imm. 2 ilanngunneqarpoq, tassani aalajangersarneqarluni Maalaaruteqartarfiup naammagittaalliorsinnaaneq pillugu aalajangersakkanik aalajangersaasoqarsimappat, Pisortat Pisiortortarneranni Neqerooruteqartitsinermi Maalaaruteqartarfik aamma maleruagassat neqeroortitsinermut inatsimmit allaanerusut malillugit aalajangiinissamut piginnaatitaaffilerneqarsinnaasoq.

Kommuninut, Nunaqarfinnut, Isorliunerusunut, Attaveqaqatigiinnermullu Naalackersuisoqarfiup aamma oqaatigaa § 2, imm. 3 naapertorlugu sinniisunik 1-imik amerlanerusunik toqqaanissaq periarfissaassagaluarmat.

Tusarniaanermut akissut tunngavigalugu sinniisunik 1-imik amerlanerusunik toqqaanissamut periarfissaq aalajangersakkamut ilanngunneqarpoq.

Kommuninut, Nunaqarfinnut, Isorliunerusunut, Attaveqaqatigiinnermullu Naalackersuisoqarfiup § 2, imm. 5-imut aamma oqaatigaa ilaasortat paasisimasallit kisimik sulinerminni namminersortuussanngimmata, kisianni aamma siulittaasoq.

Tusarniaanermut akissut tunngavigalugu siulittaasoq sulinermini aamma kiffaangissuseqassanera qularnaarniarlugu siulittaasoq § 2, imm. 5-imut inissinneqarpoq.

Kommuninut, Nunaqarfinnut, Isorliunerusunut, Attaveqaqatigiinnermullu Naalackersuisoqarfiup aamma oqaatigaa § 5, imm. 6-imi naammagittaalliuteqarnermut akiliutip akilernissaanut piffissaliusaaq qaammat 1-iusoq sivisuallaartoq suliallu ingerlarnganik kinguarsaataasinnaasoq. Taassuma saniatigut suliap aalajangiiffigineqarnissaanut piffissaliinermik ingerlatitseqqisoqarsimangilaq, soorlu neqerooruteqartarneq pillugu inatsimmi taamaattoq.

§ 5, imm. 6-imi (maanna § 5, imm. 7-imi) aalajangersakkami piffissaliusaaq eqqaaneqarpoq, erseqqissarneqarlunilu naammagittaalliutip suliarinera aallartinneqarsinnaanngitsoq akiliut akilerneqaqqaartinnagu. Taamaattumik akiliutip pilertortumik akilerneqarnissaa naammagittaalliortup nammineq aalajangigassarivaa suliaq aallartinneqassappat. Maalaaruteqartarfiup pisussaaffigisariaqarpaa naammagittaalliortoq ilisimatissallugu akiliut akilerneqartinnagu suliaq aallartinneqassanngitsoq. Kingulleq taaneqartoq pisussaaffik aalajangersakkamut oqaaseqaatinut immikkut ittunut ilanngunneqarpoq.

Pisortat Pisiortortarneranni Neqerooruteqartitsinermi Maalaaruteqartarfik ataatsimiititaliaavoq namminersortoq, taamaammallu maalaaruteqartarfimmi suliat suliarineqartarnerannut piffissaliinissaa akunnattoorfeqassaaq.

Kommuninut, Nunaqarfinnut, Isorliunerusunut, Attaveqaqatigiinnermullu Naalackersuisoqarfiup aamma oqaatigaa § 6, imm. 3 naapertorlugu pinngitsaaliissummik akiliisitseqquneq neqerooruteqartarneq pillugu inatsimmut naleqqiullugu pinngitsaalissutit pillugit aalajangersakkamik annertuumik sukannernerulersitsinerummat neqerooruteqartitsinermi inatsisip § 34-iani. Tamatuma saniatigut oqaatigineqarpoq § 6, imm. 2-mi paasissutissanik suliamut pingaaruteqartut isigineqartunik pissarsiniarneq pillugu, paasissutissanik suliap maalaaruteqartarfiup oqartussaaffianut ilaaneramik aalajangiussinissamut pisariaqartut pissarsiarinissaannut tunngavissaqartitsinngimmat.

Maalaaruteqartarfik pisariaqartinneqartunik piginnaaneqarnersoq pillugu naliliineq, maalaaruteqartarfiup pisariaqartinneqartumik piginnaaneqannginnera pissutigalugu naggataatigut itigartitsissutaasinnaasoq, § 6, imm. 2 tunngavigalugu paasissutissat pissarsiarinissaannut aamma ilanngunneqarsinnaasoq, tassungalu immikkut nassuiaatini aamma itisilerneqarluni.

Kommuninut, Nunaqarfinnut, Isorliunerusunut, Attaveqaqatigiinnermullu Naalackersuisoqarfiup aamma oqaatigaa siulittaasup aamma ilaasortap paasisimasallip 1-ip najuunnerisigut suliap aalajangiiffigineqarsinnaaneranut suna tunngavilersuutaanersoq apeqqutigaa, aamma tulluarnertullugu ilaasortat paasisimasallit 2 aalajangiinermi peqataappata. Aammattaaq siunnersuutigineqarpoq siulittaasoq suliani periaatsimut

tunngaviunngitsumik pissuseqartuni aalajangiisinnaatitaassasoq allaffissornikkut nammakkiineq oqilisarniarlugu.

Tusarniaanermut akissut tunngavigalugu aalajangersagaq ima allanngortinneqarpoq ilaasortat paasisimasallit 2, siulittaasup saniatigut, maalaaruteqartarfiup sulianik aalajangiinerini peqataasassasut. Tamatuma saniatigut aalajangersagaq aamma allanngortinneqarpoq siulittaasup suleriaatsinut apeqqutit kisiisa pinnagit aalajangiiffigisinnaannorlugit kisianni aamma suliani periaatsimut tunngaviunngitsumik pissuseqartuni ilaasortat paasisimasallit peqataatinnagit, tamakku § 11, imm. 1-imut oqaaseqaatini immikkut ittuni itisilerneqarput.

Kommuneqarfik Sermersuup allappaa ilaasortat paasisimasallit pisortat oqartussaasui aamma sanaartornermik suliaqartartut akornanni attuumassuteqartut innersuussereernerisigut toqqarneqartariaqaraluartut, suliat suliarineqartarnerat qaammatinik 3-nik killeqartoq ikkunneqartariaqartoq, naammaginangitsoq sanaartornermik sulianut naammagittaalliuuteqarnermut akiliut aamma kr. 10.000-inut aalajangerneqarsimammat, aammalu naammagittaalliuuteqartarfik aalajangiisinnaassaguni 2-nik inuttaqartoq qaqutigoortuummat.

Kommuneqarfik Sermersuup oqaaseqaatai siuliani sammineqarput, aaqqiissutillu ikkunneqarsimallutik ilaatigut tusarniaanermut akissut manna tunngavigalugu.

KANUKOKA-p oqaatigaa maalaaruteqartarfik sullissinermi tunngavigineqartoq tunngavigalugu ingerlasoq, taavalu § 6, imm. 2 aamma 3 naapertorlugit paasissutissanik pissarsiniarnermi tunngavigineqartoq annertunerusumik erseqqissarneqarnissaa ujartorlugu, tamatumalu § 8, imm. 1-imut allaganngorlugit paarlaasseqatigiinnernut taannalu tunngavigalugu aalajangiiffigineqarneranut attuumassuteqarnera.

Pisortat Pisiortortarneranni Neqerooruteqartitsinermi Maalaaruteqartarfik sullissinermi tunngavigineqartoq (officialprincip) tunngavigalugu toqqaannartumik ingerlanngilaq, tamanna § 9-mi nassuiarneqarpoq. Kisiani nukissanik iluaqutiginninneq kinguneqartitsilluartoq qularnaarumallugu aalajangersakkami allassimavoq aalajangiullugu oqaatigisanik imaluunniit pissutsinik piviusunik aamma pissutsinik inatsisinut tunngasunik innarliisut illuatungeriinnit saqqummiunneqartut maalaaruteqartarfiup aalajangiiffigineq ajormagit. Taamaalilluni suliap suliarineqarnera eqqartuussivinnit ilisimaneqartoq annerusumik assigilissavaa, taakkulu isumaqatiginninniarnissamut tunngaviusumik aalajangigaq malitalalugu. § 8, imm. 1 (maanna § 9-p) aalajangersarpaa maalaaruteqartarfirmi suliap suliarineqarnissaanut piareersaatit tamarmik allagaasumik pisassasut, aamma aallaavittut aalajangiinerit allagaasumik tunngaveqartillugit pisassasut. Taamaalilluni aatsaat pisuni immikkut ittuni oqalulluni isumaqatiginninniarnit pisinnaapput. Siunertaq tassaavoq naammagittaalliuuteqartumi, naammagittaalliorfigineqartumi aamma maalaaruteqartarfirmi nukissat sapinngisamik ikittut naammagittaalliuutit suliarinerini atorneqassasut.

Siunnersuummut nassuiaatit

Siunnersuummi aalajangersakkanut ataasiakkaanut nassuiaatit

§ 1-imut

Aalajangersakkami inatsisip atuuffissaa aalajangersarneqarpoq.

Imm. 1-imut

Aalajangersakkami aalajangerneqarpoq, pisortani oqartussani aamma sullissivinni nioqqutissanik kiffartuussissutinillu pisiniarnermut atatillugu neqeroortitsisarneq pillugu Inatsisartut inatsisaat (neqeroortitsisarnermut inatsit) unioqqutinneqarsimanerata aalajangerneqarnissaa naammagittaalliornermi siunertaasimappat, Pisortat Pisiortortarneranni Neqerooruteqartitsinermi Maalaaruteqartarfimmut naammagittaallioraqarsinnaasoq.

Imm. 2-mut

Inatsisaasuni allani Pisortat Pisiortortarneranni Neqerooruteqartitsinermi Maalaaruteqartarfimmut maalaaruteqarsinnaaneq pillugu aalajangersakkanik aalajangiisoqarsimassappat neqeroortitsisarnermut inatsimmut naleqqiullugu malittarisassianik allanik najoqqutaqarluni Pisortat Pisiortortarneranni Neqerooruteqartitsinermi Maalaaruteqartarfik aamma piginnaaneqartinneqarsinnaanerani aalajangersagaq nassataqarpoq.

§ 2-mut

Aalajangersakkami Pisortat Pisiortortarneranni Neqerooruteqartitsinermi Maalaaruteqartarfiup aaqqissugaanera aalajangersarneqarpoq.

Imm. 1-imut

Maalaaruteqartarfik tassaavoq siulittaasoq 1 aamma suliatigut paasisimasaqartut ikinnerpaamik 2. Suliatigut paasisimasaqartut, naammagittaalliorarfimmut atassuteqartut amerlassusaat inatsimmi aalajangersarneqanngilaq. Suliani ataasiakkaani suliatigut paasisimasaqartut ikinnerpaamik 2 peqataassapput, pisariaqartinneqarpalli amerlanerusut peqataasinnaallutik.

Imm. 2-mut

Ilaasortat taakkulu sinniisui ukiut 4 tikillugit piffissamut toqqarneqarsinnaapput.

Imm. 3-mut

Ilaasortanut ataasiakkaanut tamanut sinniisussamik 1-imik amerlanerusunilluunniit toqqaasoqassaaq, ilaasortap takkussinnaannginnerani takkussinnaasumik.

Imm. 4-mut

Politikkikkut allaffissornikkullu aaqqissugaanermut naleqqiullugu attaviitsuuneq qulakkeerniarlugu naammagittaalliortarfiup siulittaasua Kalaallit Nunaanni Eqqartuussisumit toqqaarneqassaaq. Siulittaasoq inatsisilerisutut soraarummeersimassaaq.

Kalaallit Nunaanni pisortani suliaqartuusunit aamma inuussutissarsiornermit innersuussineq najoqqutaralugu Pisortat Pisiortortarneranni Neqerooruteqartitsinermi Maalaaruteqartarfiup sulianik ilisimasalittut ilaasortai Naalakkersuisunit toqqaarneqartassasut imm. 4-mi aalajangersarneqarpoq. Ilaasortanik sulianik ilisimannittunik, taakkulu sinniisussaannik toqqaanermi najukkami suliaqarfiusuni soqutigisarisani kiffaanggissuseqarneq pingaartuutinneqassaaq, taamaattumillu ilaasortat Kalaallit Nunaanni najugaqartuunngitsut toqqarnissaat pisariaqarsinnaavoq.

Maalaaruteqartarfiup aalajangiisarneri sapinngisamik qaffasinnerpaamik pitsaassuseqarnissaat qulakkeerniarlugu, aamma suliassat naammagittaalliortarfimmut suliatigut annertusinnaaneri naatsorsuutigineqarmat ilaasortat pisortat pisiniartarnerinik ilisimasaqarnissaat imaluunniit inatsisilerinikkut paasisimasaqarnissaat piumasaqaatigineqarpoq.

Imm. 5-imut

Maalaaruteqartarfiup suliaqarneranut aamma soqutiginnittut Maalaaruteqartarfimmut tatiginninnissaat eqqarsaatigalugu pingaartuuvoq siulittaasoq ilaasortaasullu Maalaaruteqartarfimmik sulinerminni arlaannaannulluunniit attuumassuteqaratik sulissasut. Tamanna ilaatigut isumaqarpoq suliani ataasiakkaani tamani sukumiisumik isumaliutigineqartassasoq ilaasortaq suliami illuatungeriiusut soqutigisaannut akerliusunik imaluunniit assigiinnik soqutigisaqarnerisooq. Tamanna taamaannersooq taamaanginnersorluunniit apeqqutaatinnagu aamma isumaliutigisariaqarpoq ilaasortat ilaat suliami peqataatinneqassanersooq saqquminera imaassorinarpat sulinermini arlaannaannulluunniit attuumassuteqanngitsoq.

Imm. 6-imut

Siulittaasoq ilaasortallu toqqaarneqaaqqinnissaat periarfissaavoq. Aamma qasseriarluni toqqaqqittoqarsinnaaneranut killiliisoqanngilaq.

Imm. 7-imut

Imm. 7 tunngavissiivoq Pisortat Pisiortortarneranni Neqerooruteqartitsinermi Maalaaruteqartarfiup ilaasortai akissarsiaqartinneqassasut Inatsisartunut Naalakkersuisunullu il.il. ilaasortat aningaasarsiaqartitaanerit il.il. pillugit Inatsisartut inatsisaat naapertorlugu.

Tamatumunnga pissutaasoq tassaavoq Pisortat Pisiortortarneranni Neqerooruteqartitsinermi Maalaaruteqartarfiup suliarisartagassaat annertuutut oqaatigisariaqarmata, taamaattumillu ilaasortat maalaaruteqartarfimmik ilaasortatut sulinerminni akissarsiaqartinneqassallutik.

§ 3-mut

Aalajangersagaq Pisortat Pisiortortarneranni Neqerooruteqartitsinermi Maalaaruteqartarfimmut taassumalu allattoqarfianut tunngassuteqarpoq.

Imm. 1-imut

Maalaaruteqartarfimmut allattoqarfiliisoqassaaq, taassuma suliaqarnerani ikiuuttussamik.

Imm. 2-mut

Maalaaruteqartarfimmi sulinermut najoqqutassanik erseqqinnerusunik, kiisalu naammagittaalliortarfiup akisussaaffiit agguataarnerinik aalajangiinissamut siulittaasoq aalajangiissaaq. Tassunga ilaatigut ilaapput angissuseq, katitigaaneq, suleriaatsit ataatsimiittarnerillu akulikissusaat.

§ 4-mut

Aalajangersakkami allanneqarpoq kikkut naammagittaalliuuteqarsinnaanersut kiisalu akuliunnissamut maalaaruteqartarfimmi peqataanngitsup akuliunnissamut periarfissaanik aalajangersaasoqarluni.

Imm. 1-imut

Aalajangersakkami § 1 naapertorlugu kikkut naammagittaalliornissamut pisinnaatitaaffeqartut aalajangersarneqarput.

Nr. 1-imut

Kinaluunniit inatsisitigut soqutigisaqartoq naammagittaalliornissamut pisinnaatitaaffeqarpoq. Taaguut inatsisitigut soqutigisaqartoq inatsisilerinikkut suleriaatsimut naapertuuttumik nassuiarneqassaaq.

Inatsisilerinikkut soqutigisaqarnerup malitsigisaanik naammagittaalliorsinnaanermut pisinnaatitaasunut assersuutit:

- Tunniussineq pillugu aalajangiinermut neqerooruteqartut naammagittaalliuuteqarnissamut pisinnaatitaaffeqarput.
- Qinnuteqartut neqerooruteqartullu saneqqunneqartut suliariumannittussarsiuussinerup ingerlanneqarnera pillugu naammagittaalliuuteqarnissamut pisinnaatitaaffeqarput.
- Inatsisilik unioqqutitsisoqarsimaneramik oqaaseqartoqarsimatillugu

taarsiiffigitinnissamut pisinnaatitaasinnaasutut eqqarsaatigineqarsinnaasut inatsisunik unioqquitsineq pillugu naammagittaalliuuteqarnissamut suliffeqarfiit pisinnaatitaaffeqarput.

- Neqeroortitsineq malittarisassat naapertorlugit ingerlanneqarsimappat, qinnuteqarsimasinnaasuugaluit imaluunniit neqerooruteqarsimasinnaasut imaluunniit pilersuisuusinnaasimagaluit, malittarisassanik unioqquitsinermut pisuusimasumut naammagittaalliuuteqarnissamut suliffeqarfiit pisinnaatitaaffeqarput.

Neqerooruteqartup neqeroortitsinermi atugassanik nammineq eqqortitsisimanersoq neqerooruteqartup naammagittaalliuuteqarsinnaaneranut pingaaruteqanngilaq.

Nr. 2-mut

Kattuffiit aamma pisortani oqartussat Naalakkersuisunit naammagittaalliorsinnaatinneqartut naammagittaalliorsinnaapput. Soqutigisaqaqatigiiffittut kattuffiit imaluunniit oqartussaasut aalajangersakkami ilaasut sorliit aalajangersakkami ilaanersut pillugit nalunaarutikkut immikkut ittunik malittarisassianik aalajangersaavigineqarsinnaanerinik aalajangersagaq nassataqarpoq. Taakkua tassaasinnaasut soqutigisaqaqatigiiffiit imaluunniit oqartussat inatsit malillugu neqeroortitsisoqarnissaanut immikkut soqutigisaqartut, eqqarsaatigineqarsinnaavoq. Siunertaavoq maalaaruteqartarfiup nakkutiginnittuisa annertusarneqarnissaat.

Imm. 2-mut

Neqeroortitsisumut naammagittaalliuutigineqartumut iluaqutaasussamik annertuumik pingaaruteqartumik suliameq peqataanngitsoq imaluunniit pisortani oqartussat suliameq akuliuttussamik naammagittaalliortarfik akuersisinnaavoq.

Assersuutigalugu neqeroortitsisup pineqartullu akornanni siunissami sunniuteqarsinnaasumik aalajangiisoqassatillugu suliaq annertuumik pingaaruteqarsinnaavoq.

Namminersorluni naammagittaalliorsinnaaneq pineqanngilaq. Imm. 1-imi ilaasut kisimik naammagittaalliuuteqarsinnaatitaapput.

§ 5-imut

Naammagittaalliuutip Pisortat Pisiortortarneranni Neqerooruteqartitsinermi Maalaaruteqartarfimmut qanoq tunniunneqarnissaanik aalajangersagaq aalajangersaavoq.

Imm. 1-imut

Naammagittaalliuuteqarnissamut periarfissaq sapaatit akunneri avaqqunneqarsinnaanngitsumik sisamaapput.

Aalajangiineq pisiniariniakkanik nalunaartumit nalunaarutigineqarsimasutut isigineqarpoq pisiniariniakkanik nalunaartup aalajangiussap neqerooruteqartumut nassiussineratigut. Naammagittaalliuutit suliarinissaanut naammattumik piffissaliisoqarnissaa peqatigisaanillu neqeroortitsinermi sulinerup inernerpeqataasunut soqutigisaqatigiinnullu inaarutaasumik sukkanerpaamik isigineqarnissaa eqqarsaatigalugit piffissaliussaq aalajangersarneqarpoq.

Imm. 2-mut

Naammagittaalliummik maalaaruteqartarfimmut tunniussisoqarsimanera pillugu naammagittaalliuutigineqartumut nalunaaruteqarnissamut naammagittaalliuuteqartoq pisussaaffeqarpoq. Nalunaarneq kingusinnerpaamik suliap maalaaruteqartarfimmut tunniunneqarnerani pissaaq. Nalunaarneq taamaalilluni maalaaruteqartarfimmut naammagittaalliummik suli tunniussisoqanngitsoq pisinnaakutsoorpoq. Nalunaarummit takuneqarsinnaassapput unioqqutitsineraaneq pillugu paasissutissat sapinngisamik amerlanerpaat, matumunnga ilanngullugu kinguartitsisoqarnissaa piumasarineqarnersoq.

Naammagittaalliuuteqartup naammagittaalliummik tunniussineq pillugu naammagittaalliuuteqartup nalunaaruteqarnera sivikitsumik suliamik suliarinninnissaq eqqarsaatigalugu naammagittaalliuuteqarluni allakkiap assilinerani naammagittaalliuutigineqartumut nassiunneratigut pisinnaavoq, tassa aalajangersagaq tamanna pillugu piumasaqaateqanngimmat.

Imm. 3-mut

Suliap suliarineqarnissaanut tunngavissatut naleqqutinngippat naammagittaalliummik itigartitsinissamut naammagittaalliortarfik aalajangersakkamik periarfissinneqarpoq. Tamanna aalajangiisoqarneratigut pissaaq, naammagittaalliuuteqartumut naammagittaalliuutigineqartumullu nalunaaruteqarnikkut.

Aalajangersagaq isumaqatigiinniartarnermi tunngaviup kinguneraa, naammagittaalliuuteqartarfimmi atorineqartartoq, tak. § 9.

Imm. 4-mut

Aalajangersakkami aalajangerneqarpoq suliaq itigartinneqarpat, takuuk imm. 3, imm. 5 malillugu akiliut akilerneqarsimasoq utertillugu akilerneqassasoq.

Imm. 5-imut

Naammagittaalliuuteqartoq naammagittaalliummik tunniussinermut naammagittaalliummut akitsuummik 10.000 kr.-mik akiliissaaq, naammagittaalliuutigisaq pisortat oqartussaaffigisaanni suliffeqarfiinilu nioqqutissanik kiffartuussinernillu pisinermut tunngatillugu neqerooruteqartitsisarneq pillugu Inatsisartut inatsisaanni aalajangersakkat naapertorlugit tunngaveqarpat.

Imm. 6-imut

Naammagittaalliuuteqartarfiup naammagittaalliuut suliaralugu aallartissinnaangilaa naammagittaalliummut akitsuut akilerneqartinnagu. Matumunnga ilanngullugu kinguartitsisoqarsinnaaneranut naammagittaalliorfik isummernissamut periarfissaqarnani. Naammagittaalliuutip tunniunneqarneranit kingusinnerpaamik sapaatip akunneri 4 qaangiunneranni naammagittaalliummut akitsuut akilerneqarsimangippat naammagittaalliuut atorunnaartutut isigineqassaaq. Naammagittaalliuuteqartarfiup suliamut tunngasut ilisimatitsissutiginnissaat akisussaaffigivaa, taamaalillunilu naammagittaalliuuteqartarfiup pisussaaffigissavaa naammagittaalliuuteqartoq ilisimatissallugu aatsaat naammagittaalliummut akitsuut akilerneqarpat suliaq aallartinneqarumaartoq aammalu naammagittaalliummut akitsuut kingusinnerpaamik sapaatip akunneri 4 qaangiunneranni akilerneqarsimangippat atorunnaassasoq.

Imm. 7-imut

Aalajangersakkap Naalakkersuisut tunngavissippaat naammagittaalliuuteqartoq naammagittaalliuutigisani pillugu tamakkiisumik imaluunniit ilaannakortumik taperserneqarpat naammagittaalliummut akitsuut utertinneqassanersoq pillugu malittarisassat sukumiinerusut aalajangersarsinnaagaat. Tassani aningaasat nalilersorneranni ilanngunneqassaaq naammagittaalliummut akitsuuteqartitsinermit tunngavilersuutit ilagimmassuk qularnaarneqassammat naammagittaalliuutit tunngavissaqanngitsut amerlavallaartut tiguneqannginnissaat, ilaatigut maalaaruteqartarfimmi piffissamut suliat suliarineqartarnerannut atorneqartumut sivitsorsaataasarmat. Taamaalilluni naammagittaalliummut akitsuutip naammagittaalliuuteqarumaartussaq naammagittaalliuutiginiakkap isumaliutigeqqinnissaanut kajumissuseqalersitsisinnaavoq. Naammagittaalliummut akitsuuteqartitsinikkut siunertarineqanngilaq naammagittaalliuuteqarumaartussaq pissuteqarluartumik naammagittaalliuutissaqartoq naammagittaalliummik maalaaruteqartarfimmut tunniussinaveersaaqqussallugu. Taamaattumik aalajangersakkami matumani oqaatigineqarpoq naammagittaalliuuteqartoq tamakkiisumik imaluunniit ilaannakortumik taperserneqarpat akiliut utertinneqarsinnaasoq.

§ 6-imut

Aalajangersakkami pineqarput Pisortat Pisiortortarneranni Neqerooruteqartitsinermit Maalaaruteqartarfimmi suliap piareersarneqarnera.

Imm. 1-imut

§ 5 naapertorlugu naammagittaalliummik maalaaruteqartarfiup tigusinerata kingorna maalaaruteqartarfiup allakkiaq ilanngullugu naammagittaalliuutigineqartumut nassiuutissavaa. Peqatigisaanik maalaaruteqartarfiup suliami piviusumik inatsisitigut pisimasut pillugit nassuiaammik saqqummiusseqqullugu naammagittaalliuutigineqartumut noqqaassuteqassaaq,

kiisalu suliami allagaatit nassuteqqullugit. Tamatumunnga naammagittaalliortarfik aamma piffissaliissaaq.

Imm. 2-mut

Paasissutissat suliap aalajangiiffigineqarnissaanut pisariaqartutut nalilerneqartut pisariaqartut tamarmik piniarneqartarnissaat aalajangersakkami qulakkeerneqarpoq. Illuatungeriit paasissutissiinissamut pisussaaffii pillugit aalajangersakkami tassani siunertaq tassaavoq maalaaruteqartarfiup sapinngisamik pitsaanerpaamik paasissutissiisoqarnera tunngavigalugu aalajangiinissaata qulakkeerneqarneratigut naammagittaalliuuteqartarfimmi eqqortumik aalajangiisoqartarnissaa.

Tassunga atatillugu naammagittaalliuuteqartarfik aamma maalaaruteqartarfiup pisinnaatitaaffiinut ilaasut pissutsit pillugit paasissutissanik noqqaasinnaavoq.

§ 7-imut

Aalajangersagaq § 6 assigalugu aamma Pisortat Pisiortortarneranni Neqerooruteqartitsinermi Maalaaruteqartarfimmi suliap piareersarneranut tunngasuvoq.

Imm. 1-imut

§ 6, imm. 1 naapertorlugu suliami piviusunik inatsisinullu tunngasunik nassuiaammi naammagittaalliuutigineqartup tunniussinerata kingorna naammagittaalliuuteqartoq tamanna pillugu ilisimatinneqassaaq.

Tunniussinerli inatsisinut allanut akerliuppat atuutinngilaq.

Imm. 2-mut

Suliani ataasiakkaani tamani siulittaasup allakkatigut ilanngussanik suli allanik paarlaassisoqarnissaanik aalajangiinissamut aalajangersagaq periarfissaqartitsivoq.

Naammagittaalliuutigineqartup nassuiaataata itisilernissaanut, ilassuteqarnissamut imaluunniit allanik peqquteqartumik suliap paasiuminaatsuunera taamaattumillu paasissutisseeqqittoqarnissaa pisariaqartillugu aalajangersagaq pingaartumik pingaaruteqarsinnaavoq.

§ 8-mut

Aalajangersagaq – siuliani aalajangersakkat marluk assigalugit – suliap Pisortat Pisiortortarneranni Neqerooruteqartitsinermi Maalaaruteqartarfimmi piareersarneranut tunngasuvoq.

Imm. 1-imut

Aalajangersakkami aalajangerneqarpoq maalaaruteqartarfimmi suliamik piareersarnerit tamarmik allakkatigut pissasut, aalajangiinerillu aallaaviatigut allakkat tunngavigalugit aamma pissasut.

Siunertaq tassaavoq naammagittaalliuuteqartumi, naammagittaalliuutigineqartumi maalaaruteqartarfimmilu naammagittaalliummik suliaqarnermi sapinngisamik ikinnerpaanik nukinnik atuisoqarnissaa.

Peqqutit immikkuullarissut tamatumunnga pissutissaqartitsippata siulittaasoq taamaattoq aalajangiisinnaavoq suliaq oqaasiinnakkut isumaqatigiinniutigineqassasoq. Tamanna nammineq suliniuteqarnermigut siulittaasumit aalajangerneqarsinnaavoq (ex officio). Peqqutaasoq immikkuullarissuq assersuutigalugu tassaasinnaavoq oqaasiinnakkut nassuiaasoqarnissaanik pisariaqartitsisoqartillugu.

Imm. 2-mut

Naammagittaalliuuteqartumut, naammagittaalliuutigineqartumut aamma suliamut ilanngunneqartumut naapertuuttuusinnaavoq suliami paasisimasaqartumit sinniisoqarnissaq. Suliami paasisimasaqartumik sinniisoqarnerup kingunerisinnaavaa suliap piukkunnarnerusumik suliarineqarnera taamaalillunilu suliami tamakkiisumik paasisutissiisoqarneratigut eqqornerusumik aalajangiisoqarnissaa qulakkeerqarluni, soorlu isumaqatigiinniarnermi tunngavik tunngavigineqartoq, tak. § 9.

Peqqutinit siuliani allanneqartunit siulittaasumit inassutigineqarsinnaavoq allanneqartutut naammagittaalliuuteqartoq sinniisoqassasoq. Inassutaasoq tassaavoq maalaaruteqartoq, maalaarutigineqartoq, imaluunniit suliami ilaalersuq sinniisoqassaneq pillugu qinnuteqaatigisaq. Taamaattorli naammagittaalliuuteqartoq, naammagittaalliuutigineqartoq imaluunniit suliami ilaalersuq sinniisumik imaluunniit suliamik paasisimasaqartumik siunnersortinneqarnissaa piumasqaatigineqarsinnaanngilaq.

Imm. 3-mut

Aallaaviatigut imm. 2-mi eqqaaneqartut oqaasiinnakkut isumaqatigiinniarnissamut taamaallaat periarfissaqarput.

Pissutsilli immikkuullarissut tamatumunnga pissutissaqartitsippata allat oqaasiinnakkut isumaqatigiinniarnissaannut siulittaasoq periarfissamik ammaassisinnaavoq, assersuutigalugu suliaq inuiaqatigiinnit immikkut soqutiginaateqarpat.

§ 9-mut

Pisortat Pisiortortarneranni Neqerooruteqartitsinermi Maalaaruteqartarfik tassaavoq

allaffissornikkut aaqqissugaasoq, taamaattumillu pisortani tunngaviit aallaaviatigut atuullutik. Isumalluutini kinguneqarluartumik iluaquteqarnissaq qulakkeerniarlugu aalajangersakkamit takuneqarsinnaavoq oqaaserineqartunut imaluunniit pissutsinut piviusunut inatsisinullu tunngasunik illuatungeriinni saqqummiunneqarsimasut pillugit naammagittaalliortarfik aalajangiineq ajorpoq. Taamaalilluni suliarinninnerup isumaqatigiinniarnermi tunngaviit malillugit eqqartuussivinnit ilisimaneqartut annerusumik assigikannissavai.

§ 10-mut

Aalajangersagaq suliap aalajangiiffiginissaanut aamma suliami aningaasartuutit akilersinneqarnissaanut malittarisassanik imaqarpoq.

Imm. 1-imut

Aalajangersakkami aalajangerneqarpoq aalajangernerit amerlanerussuteqarnikkut atuutsinneqartassasut.

Taasinerit naligiinneri tunngavigalugit Pisortat Pisiortortarneranni Neqerooruteqartitsinermi Maalaaruteqartarfiup aalajangiinermut atatillugu aalajangiisinnaanginnera pinngitsoortinniarlugu taasinerit naligiinnerini suliani ataasiakkaani siulittaasup taasineri aalajangiisuusaaq.

Imm. 2-mut

Aalajangersakkami aammattaaq aalajangerneqarpoq suliami paasisimasaqartut ilaasortat peqataatinnagit suliap suliarinerani apeqqutit pillugit siulittaasoq aalajangiinissamut periarfissaqartoq. Tamatumunnga periarfissamut tunuliaqutaasoq tassaavoq kinguneqarluartumik suliamik suliarinninnissap qulakkeerneqarnissaa. Suliap suliarinerani apeqqutit assersuutigalugit tassaasinnaapput suliap ilai immikkoortillugit suliarineqarsinnaanersut, allagaatinik paasisaqarnissamut tunngasut aalajangiinerit, naammagittaalliuuteqartoq naammagittaalliuuteqarnissamut pisinnaatitaaffeqarnerisooq imaluunniit kinguartitsisoqarnissaa pillugu apeqqutit.

Tamatuma saniatigut aalajangersakkami aalajangersarneqarpoq siulittaasoq suliani periaatsimut tunngaviunngitsumik pissuseqartuni aalajangiisinnaatitaassasoq. Suliat maalaaruteqartarfimmi suliarineqartarnerat kinguneqartitsilluartoq qularnaarniarlugu taamaalineqarpoq. Siulittaasup aalajangissavaa qanoq ilinikkut suliaq periaatsimut tunngaviunngitsumik pissuseqarnerisooq. Assersuutigalugu taamaassinnaavoq sammisaqarfisami ersarissumik suleriaaseqaraangat. Assersuut alla tassaasinnaavoq pisiniariniakkanik nalunaartup neqeroorut piffissaliussap qaangiutereernerata kingorna tunniunneqartoq akuerippagu. Tamanna Inatsisartut inatsisaanni malittarisassaanut akerliussaaq taamaammallu sammisaqarfisami suleriaaseq ersarippoq.

Imm. 3-mut

Ingerlatsinermi paasitinneqarsinnaatitaaneq, suliap eqqartuussivimmu suliassanngortinnissaa pillugu illuatungeriit naliliisinnaanerannut tunngavissaqarneq qulakkeerniarlugit, tak. § 16, il. il. aalajangiineq tunngavilersorneqassaaq aamma naammagittaalliuuteqartumut, naammagittaalliuutigneqartumut aamma suliambut ilanngussimasumut nassiunneqassaaq.

Aalajangiineq isumaqatigiilluni pisimanngippat aalajangiineq isummamik aalajangiinermut tunngavissiinnngitsumik imaqassaaq. § 16 naapertorlugu suliap eqqartuussivimmu suliassanngortissanerlugu illuatungeriit naliliinissaannut tamanna periarfissiivoq. Aammattaaq isumaqarluni aalajangiineq pinngitsoorani aalajangiinertut isumaqatigiiffiusutut kingusinnerusukku aalajangiinermut tunngasariaqarnani.

Imm. 4-mut

Maalaaruteqartarfimmi suliamik ingerlataqarnermut atatillugu aningaasartuutit annertuujusinnaapput. Tamatuma saniatigut suliani aningaasartuutit naammagittaalliuuteqarnissamut pingaaruteqarsinnaallutik. Suliamut atatillugu aningaasartuutaasut ilaattut naammagittaalliummut akitsuut aamma ilaavoq.

Suliami aningaasartuutit tamakkiisumik ilaannakuusumilluunniit matussuserlugit peqataasup ajorsartup illuatungerisamut akiliisinnaanerani aalajangiinissamut naammagittaalliortarfik periarfissinneqarpoq. Aningaasat suliap annertussusia paasiuminaatsuuneralu eqqarsaatigalugu piviusumik aalajangerneqassapput.

Imm. 5-imut

Imm. 4-mi eqqaaneqartut suliami aningaasartuutit annerpaamik 75.000 kr.-nik annertussuseqarsinnaapput, taamaattorli tak. imm. 6. Qanoq annertutigisunik akisussaatinneqarsinnaanerintut illuatungeriinnut qularnaarniarlugu aalajangersagaq ikkunneqarpoq. Taamaalilluni aamma suliap ingerlanneqassanersoq nalilerniarlugu pitsaanagerusumik periarfissiisoqarpoq.

Imm. 6-imut

Immikkut pissutsit tamatumunnga pissutissaqartitsippata imm. 5-mi aningaasat annerpaaffigisinnaasaat naammagittaalliortarfimmit saneqqunneqarsinnaavoq. Aallaaviusooq erseqqissoq tassaavoq aningaasat annertunerpaaffissaat saneqqunneqarsinnaanngitsoq. Pissutsit immikkuullarissut eqqarsaatigineqarsinnaasut assersuutigalugu tassaavoq naammagittaalliuuteqartoq suliamik sivitsorsaappat.

§ 11-imut

Aalajangersakkami pineqarput Pisortat Pisiortortarneranni Neqerooruteqartitsinermi Maalaaruteqartarfiup aalajangiineri ukiumullu nalunaarusiaanik tamanut

saqqummiussisarneq.

Imm. 1-imut

Aalajangersakkami allanneqarpoq maalaaruteqartarfiup aalajangiussinini nittartakkamini saqqummersissagai.

Imm. 2-mut

Aalajangersakkami aalajangerneqarpoq maalaaruteqartarfiup aalajangiinerinik tamanik imaqartumik ukiumut nalunaarusiamik piareersaallunilu naammagittaalliuuteqartarfik tamanut saqqummiussisassasoq. Tamanna assersuutigalugu tassaasinnaavoq aalajangiussinirit ataasiakkaat eqikkarneqarneri. Ukiumut nalunaarut aamma maalaaruteqartarfiup nittartagaatigut tamanut saqqummiunneqassaaq.

§ 12-imut

Aalajangersakkami pineqarpoq Pisortat Pisiortortarneranni Neqerooruteqartitsinermi Maalaaruteqartarfiup naammagittaalliuut kinguartitsinermik sunniuteqartitsinissamut periarfissaqarnera.

Imm. 1-imut

Pisortat Pisiortortarneranni Neqerooruteqartitsinermi Maalaaruteqartarfik – immikkut pissutsit pissutissaqartitsippata aamma illuatungeriit arlaannit tamanna pillugu oqaaseqartoqarsimappat – naammagittaalliuut kinguartitsinermik sunniuteqartitsinissaavoq.

Imm. 2-mut

Naammagittaalliuutip kinguartitsinermik sunniuteqarnissaanut piunasaqaatigineqarpoq naammagittaalliuuteqartup suliame tapersorsorneqarnissaata ilimanaateqarnera aamma naammagittaalliuut kinguartitsinermik sunniuteqartitsinngippat naammagittaalliuuteqartoq allatigut soqutigisaminik isumaginninnissamut periarfissaqanngippat. Aammattaq eqqarsaatigisassanik killormut sammisunik soqutigisaqartut naliliisinnaapput. Illuani neqerooruteqartup neqeroorutip naammassineqarnissaanik soqutiginninnera aappaanilu naammagittaalliuuteqartup kinguartitsinissamik soqutiginninnera.

Aallaavik erseqqissoq tassa tassaavoq naammagittaalliuutip kinguartitsinermik sunniuteqannginnissaa.

§ 13-imut

Aalajangersakkami Pisortat Pisiortortarneranni Neqerooruteqartitsinermi Maalaaruteqartarfiup kinguneqartitsinissamut periarfissai aalajangersarneqarput.

Suliakkiisoq maalaaruteqartarfiup aalajangiussineranut naapertuuttumik iliuseqarnissaminut pisussaaffeqarneranik peqqussuteqarneq nassataqartitsivoq.

Aalajangersakkami aalajangerneqarpoq naammagittaalliuuteqartarfik, naammagittaalliuutigineqartup neqeroortitsisarnermi inatsimmi malittarisassanik unioqutitsisimappat naammagittaalliuuteqartarfik:

Naammagittaalliuuteqarfigineqartup neqerooruteqarnerminut atatillugu neqeroornermini suleriaasia imaluunniit aalajangigai tunuartissinnaavai.

Naammagittaalliuutigineqartup neqeroortitsinermi suleriaasia tamaat imaluunniit neqeroortitsinermik suliaqarnermut atatillugu aalajangiinerit atorunnaarsinnissaannut naammagittaalliortarfik periarfissaqarpoq.

Naammagittaalliuuteqarfigineqartup unioqutitsilluni aalajangigai imaluunniit neqeroorutai atorunnaarsissinnaavai.

Naammagittaalliuuteqarfigineqartup unioqutitsilluni aalajangigai imaluunniit neqeroorutai atorunnaarsissinnaavai.

Aalajangersakkami pineqarput ingerlatsivinni inatsiseqarnikkut aalajangiinernik atorunnaarsitsisinnaaneq. Tamanna assersuutigalugu tassaasinnaavoq neqeroortitsisumut aalajangersimasumut suliassamik tunniussineq pillugu aalajangiineq. Akerlianilli aalajangersakkami pineqanngilaq inuit ataasiakkaat pisinnaatitaaffii pillugit isumaqatigiissutit. Naammagittaalliuuteqartarfik taamaalilluni neqeroortitsisup isumaqatigiissutai isumaqatigiissutigineqarsimasut sunniuteqarunnaarsillugit aalajangiisinnaanngilaq.

Neqerooruteqarnermut atatillugu neqerooruteqarnermi suleriaaseq imaluunniit aalajangiinerit inertequtaajunnaarnissaat peqqussutigisinnaavaa.

Neqeroortitsinermi suleriaatsini imaluunniit neqeroortitsinermut atatillugu aalajangiisimanini inatsisinut naapertuutilersissagai naammagittaalliuutigineqartumut naammagittaalliuuteqartarfik peqqusisinnaavoq.

Maalaaruteqartarfiup aalajangiineri tamatigut naleqqiussinerussapput. Tassa imaappoq aalajangiinerni maalaaruteqartarfiup inatsisinik unioqutitsinerup aalajangiinermut sunniuteqartitsinikkut sakkortussusia nalilersussagaa. Suliamut atasut tamaasa kiisalu inunnit tamanit soqutigisat maalaaruteqartarfimmit nalilersorneqassapput. Tamanna pingaartumik isumaqatigiissusiortoqareernerani neqerooruteqartitsinermik allannguisoqarsinnaatillugu atuuppoq.

§ 14-imut

Aalajangersakkami pineqarput Pisortat Pisiortortarneranni Neqerooruteqartitsinermi Maalaaruteqartarfiup taarsiisoqarnissaanut aalajangiinissamut periarfissaa.

Aalajangersakkami aalajangersarneqarpoq neqeroortitsisarnermut inatsimmik naammagittaalliuutigineqartup unioqqutitsinerata malitsigisaanik annaasanut naammagittaalliuuteqartoq taarsiiffigineqassanerani naammagittaalliuuteqartarfik aalajangiisinnaasoq.

Tamanna pillugu naammagittaalliuuteqartoq piumasaqarsimappat aamma piumasarineqartuniit annertunerusunik naammagittaalliuuteqartoq tunineqassanngippat taarsiisoqarnissaa taamaallaat maalaaruteqartarfiup aalajangiiffigisinnaavaa.

Aammattaaq taarsiisoqarnissaa pillugu Kalaallit Nunaanni malittarisassat nalinginnaasut piumasaqaatillu atuupput.

§ 15-imut

Aalajangersagaq pinerluttulerinermi inatsisinut tunngasuvoq.

Nr. 1-imut

Aalajangersagaq malillugu Pisortat Pisiortortarneranni Neqerooruteqartitsinermi Maalaaruteqartarfimmut piaaraluni imaluunniit ingasattumik mianersuaalliorluni paasissutissanik eqqunngitsunik paatsiveerunnartunillu tunniussisoqarsimatillugu pinerluttulerinermi inatsisitigut akisussaasoqassaaq.

Pinerluttulerinermi inatsisitigut pineqaatissiineq tassaavoq akiliineq.

Aalajangersakkami tassani siunertaq tassaavoq maalaaruteqartarfimmi suliaq pillugu paasissutissiinissamut akerliliisinnaanerup pitsaaliorneratigut maalaaruteqartarfimmi aalajangiinerit eqqortuunissaasa anguneqarnissaat.

Nr. 2-mut

Aalajangersagaq malillugu naammagittaalliorfimiit inerteqqutit imaluunniit peqqussutit malinneqanngippata pinerluttulerinermi inatsisitigut akisussaatisoqarsinnaavoq.

Pinerluttulerinermi inatsisitigut pineqaatissiineq tassaavoq akiliineq.

Aalajangersakkami siunertaq tassaavoq maalaaruteqartarfiup aalajangiinerinik malinninngitsoornerup pitsaaliornissaa.

Imm. 2-mut

Aalajangersakkami tunngavissalerneqarpoq, pisinnaatitaasut pisussaataasullu akileeqqusissuteqarnermik pineqaatissinneqarsinnaasut.

Imm. 3-mut

Aalajangersakkami qulakkeerneqarpoq, akileeqqusissutit pineqaatissiissutigineqartut Nunap karsianut tutsinneqassasut.

§ 16-imut

Aalajangersakkami Pisortat Pisiortortarneranni Neqerooruteqartitsinermi Maalaaruteqartarfiup aalajangiineri pillugit naammagittaalliuteqarnissamut periarfissat aalajangersarneqarput.

Imm. 1-imut

Maalaaruteqartarfiup aalajangiineranik eqqartuussivinnut suliassanngortitsineq aalajangiinerup pineqartumut nalunaarutigineraniit kingusinnerpaamik sapaatit akunneri arfineq pingasut qaangiutsinnagit pissaaq. Piffissaliussap sivilissusaa inatsisitigut isumannaatsuunissaq eqqarsaatigalugu aalajangersarneqarpoq. Siullermi pineqarpoq suliap eqqartuussivinnut suliassanngortinnissaanut naammattumik piffissaqarnissap eqqarsaatigineqarnera. Aappaatut aalajangiinerup allanut naleqqiullugu sukkasuumik illuatungeriinnut peqataasunut soqutigisaqaqatigiinnullu inaarutaasumik isigineqarsinnaaneranut inatsisitigut isumannaatsuunissamut illuanik eqqarsaatiginninnissaq nalilersorneqarpoq, taamaalillutik taanna naapertorlugu inissitsitersinnaallutik.

Imm. 2-mut

Aalajangersakkami aalajangersarneqarpoq allaffissornikkut allamut qaffasinnerusumut naammagittaalliornissamut periarfissaqanngitsoq.

§ 17-imut

Imm. 1-imut

Inatsisartut inatsisaat ulloq 1. januar 2019 atuutilerpoq.

Taamaalilluni Inatsisartut inatsisaat kingumoortumik atuutsitaanngilaq.

Imm. 2-mut

Inatsisartut inatsisaat pisiarisanut atuuppoq, isumaqatigiissutinut pisiortorfimmi ulloq 1. januar 2019-imi imaluunniit kingusinnerusukkulluunniit isumaqatigiissutigineqartuni.